



ज्वजलपा वाह्यो

JWOJALAPA WEEKLY

दैं ७ ल्या: २३ (पूर्णडक १२५) ने. सं. ११३७ पोहेलागा तुतिया आइतवा: २०७३ माघ ०२ गते आइतवार (Jan- 15, 2017)

मू द १- पृष्ठ ६

छ्याक:ल्वहतय् थुकलं बिया पृथ्वीनारायण द:गु ल्वंदुथाय् सभा 'पृथ्वीनारायण शाहया इलंनिसें जूगु विभेद कायम'

**‘ऐतिहासिक छ्याक:ल्वहं
आकर्षक जुइकल,
द्य:ध्वाखाया पुजा
यानात:गु ल्वहं धा:सा
भन भन लहानावन’**



ज्वजलपा वा:पौ /

थनि दच्छि न्ह्य: तक किपूया मंगल स्कूलया च्वसं च्वंगु छ्याक:ल्वहं र्व धका: मालेमा:गु अवस्था ख: । जंगलया लिक्क च्वंगु प्यका लेंय लानाच्वंगु छ्याक:ल्वहं ज:ख: नं फुक्क हे ल्वहंया ल्वहं दुगु अले लें दथुइ हे लानाच्वंगुलिं सीके थाक्याच्वंगु ख: ।

मनूतय् अन छ्याक:ल्वहं दु धका: धायेबले नं लुइके थाकूगु अवस्था ख: । तत्कालिन अवस्थाय् गोरखा राज्य विस्तारया भूवलय् पृथ्वीनारायण शाहया फौज निक्क:तक बांमलाक्क हे पराजित जूगु अले छक: ला पृथ्वी नारायण शाहयात किपूमितय्सं नियन्त्रणय् कया स्यायेत्यंगु अवस्थाय् जुजुयात जुजुं हे स्यायेमा: धका: त्व:तेव विसिउँ वंगु खं इतिहासया पानाय् न्ह्यथनात:गु दु ।

पृथ्वीनारायण शाहयात किपूया हे धन्चा बुढाया सन्तानं साथ बिया किपुलिइ गद्दार या:गु अले व हे धन्चा बुढायात गद्दार या:मह धका: ध्याचू नकेगु कथंया ज्या याना वयाच्वंगु संस्कृति धइगु धेधेपापा संस्कृति ख: ।

गुन्हपुन्हिया भूवलय् थौकन्हय् तक नं उगु हे कथं धन्चा बुढा नापं इमि छेंज:पिन्त ध्याचू नकेगु कथं ख्वा:पा: पुया प्याखं ल्ह्या क्यना वयाच्वंगु दु ।

पृथ्वीनारायण शाह नं किपुलिइ भंग: लहाना त्याकूगु अले किपू त्याकेधुंका: तर्क किपूया भौतिक संरचना नष्ट यायेगु जक मखु सु सु किपूमित नापलात इमिगु इमिगु न्हाय् तर्क ध्येनेगु ज्या या:गु ख: । त्याके धुंका: तर्क अन्याय यायेगु कथं न्हाय् ध्येनेगु तर्क ज्या या:मह पृथ्वीनारायण शाहयात किपूमितय्सं बांला:गु गबलें न मस्वल ।

वरु पृथ्वीनारायण शाह येंया हनुमानध्वाखा दरबारय् च्वना राज्य चलेया:गु इलय् किपूमितय्सं पृथ्वी नारायण शाह धाइमह छ्याख: ल्वहं नाप तुलना याना वयागु नामय् थुकलं बिइगु ज्या याना वयाच्वंगु ख: ।

व हे छ्याक: ल्वहतय् मंका: कथं थुकलं बिइगु ज्या वंगु पुष २७ गते या:गु दु । नेवा: प्रदेशय् आदिवासी जनजाति जागरण अभियानया र्वसालय्

अथे छ्याक:ल्वहतय् मंका: कथं थुकलं बिइगु ज्या या:गु ख: ।

वंगु दैनिसें न्ह्याकूगु उगु अभियानया भूवलय् थुगुसी छ्याक:ल्वहं नापं पृथ्वीनारायण शाहनाप स्वापू दुगु खं नेवा: प्रदेशय् आदिवासी जनजाति जागरण अभियानया कजि अर्जुन महर्जन व नेवा: प्रदेशय् आदिवासी जनजाति जागरण अभियानया अभियान्ता नापं नेवा: पत्रकार राष्ट्रिय दबूया केन्द्रीय दुज: श्रीकृष्ण महर्जन कनादीगु ख: ।

पृथ्वीनारायण शाहया बुदिंया दिनय् छ्याक:ल्वहतय् मंका: कथं थुकलं बिइगु ज्या क्वचायेका याली हे याना चीथु, इताछें, गुने, सलिछें, ग:छें, खिउँफल्चा जुया द्य:ध्वाखाया तुल्सी देग: दुगु लागाय् वंगु ख: । किपूमित, येंमितनिसें आदिवासी जनजातित नं उगु याली व सभाय् सहभागी जुयादीगु ख: । पृथ्वीनारायण शाह चुलुया द:गु ल्वहंयात पुजा यानात:गु थासय् कोणसभा तर्क जूगु ख: ।

उगु सभाय् नेवा: प्रदेशय् आदिवासी जनजाति जागरण अभियानया अभियान्ता नापं नेवा: पत्रकार राष्ट्रिय दबूया केन्द्रीय दुज: नजरराम महर्जन, आदिवासी जनजाति मानवअधिकार सम्वन्धी वकिलतयगु पुच: लाहुर्निपया छ्याञ्जे नापं अधिवक्ता शंकर लिम्बु, नेपाल आदिवासी जनजाति महासंघया छ्याञ्जे शुखवीर थामिं उगु अभियानयात समर्थन याना न्ववानादीगु

ख: । अथे हे किपूमि धर्म महर्जन चिनाखें न्यंकादीगु उगु ज्याभूवलय् येंमि विश्वनाथ श्रेष्ठ थ: नं नेवा: प्रदेशय् आदिवासी जनजाति जागरण अभियानय् दु धका: धयादीगु ख: ।

पृथ्वी नारायण शाह द्य:ध्वाखाया ल्वहतय् चुलुया द:गु अवस्थाय् किपूमितय्सं नियन्त्रणय् कया नं इमान्दारीता पूर्वक जुजुयात जनतां स्याये मजिउ धका: त्व:तूगु अवस्थाय् विसिउँ वंगु तर किपू त्याकेधुंका: पृथ्वीनारायण शाह नं धा:सा किपूमितय्गु न्ह्याय् तर्क ध्येनेगु ज्या या:गुलिं बास्तवय् पृथ्वीनारायण शाह चुलुया द:गु ल्वहं किपूमितय्गु नितिं द्य: हे जुल धका: तायेका उगु ल्वहंयात पुजा याना वयाच्वंगु खं वक्तातय्सं कनादीगु ख: ।

छ्याक:ल्वहं दुगु थासय् व पृथ्वी नारायण शाह चुलुया द:गु थासय् न्ववानादीपिन्सं पृथ्वीनारायण शाह नं गुगु कथं गोरखा राज्य विस्तार या:गु ख: उकियात नेपा: एकीकरण धका: भंग:ल्लायेगु ज्या यानाच्वंगु दु धयादिसें गबलेनिसें पृथ्वीनारायण शाह नं त्याकल अबलेनिसें हे विभेद सुरु जूगु ख: धका: धयादिल ।

अबले शाहवंशं अन्याय या:गु ख:सा आ: छुं छुं समुदायपाखें आदिवासी जनजाति नापं नेवा:तय् विभेद याना वयाच्वंगु अले जारी जूगु संविधान तर्क आदिवासी जनजातिया हक अधिकार मदुगु अले खस आर्यया नितिं जूगु दु धका: धयादिल । नेवा:तय्गु

हक अधिकार कायेगु ख:सा संघर्ष यायेमा:गु आ:या बाध्यकारी अवस्था ख: धयादिसें वक्तातय्सं फुक्क आदिवासी जनजाति नापं उत्पीडित समुदाय छप्पं जुया हक अधिकारया नितिं न्ह्या: वनेमा: धका: व: बियादीगु ख: ।

अन जूगु कोणसभाय् न्हापाया दैय् छ्याक:ल्वहं सीके थाकूगु अवस्था ख:सा स्थानीय मनूतय्सं गुगु कथं छ्याक: ल्वहंया महत्वयात थुइका अन अप्पासिया छ्याक:ल्वहं स्पष्ट सीके फइगु कथंया वातावरण दयेकल आ: द्य:ध्वाखाया स्थानीय मनूतय्सं नं पृथ्वीनारायण शाह चुलुया द:गु ल्वहं भन भन लहाना वंगुलिं उकियात नं स्पष्ट खंके फइगु कथंया व्यवस्था यात धा:सा बांलाइ धका: तायेकादीगु ख: ।

उगु अभियानय् नेवा: पत्रकार राष्ट्रिय दबूया केन्द्रीय दुज: नविन जोशी, पत्रकारपिं गौतम महर्जन, ज्ञानकुमार महर्जन, विराजकाजी राजोपाध्याय, उमेश श्रेष्ठ, राजेन मानन्धर उगु हे कथं किपूया स्थानीयवासी कृष्णहरी महर्जन, भरत महर्जन, रवि महर्जन उगु हे कथं थक्वा:या शान्तप्रकाश श्रेष्ठ, येंया गौतम महर्जन लगायत नं सहभागी जुयादीगु ख: ।

थुगु कथंया ज्याभूव: निरन्तर रुपं याना वनेगु जुइ थ्व धइगु चेतना बलकेंगु छगू कथंया अभियान ख: धका: र्वसा:खलकं धा:गु दु ।

किपा: विशेष ६ पेजय्



ज्वजलपा वा:पौ

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

किपू नगरपालिका व दक्षिणकाली नगरपालिका छगू हे यायेगु प्रस्ताव

गाउँपालिका, नगरपालिका, विशेष क्षेत्र, स्वायत्त क्षेत्र व संरक्षित क्षेत्रया सिमाना नापं संख्या निर्धारण यायेगु भाला बिउगु बालानन्द पौडेलया नेतृत्वय् दयेकूगु आयोगं गाउँपालिका व नगरपालिकाया जक ज्या याना आदिवासी जनजातितलिसे स्वापू दुगु विशेष, स्वायत्त व संरक्षित क्षेत्रया ज्या मया:गुलिं अधुरो व अपूरो प्रतिवेदन तयार याना सरकारयात ल:ल्हात धका: जनजातियसं आपत्ति प्वंका वयाच्वंगु दु ।

नेवा:तय्सं नं अधूरो व अपूरो धयाच्वंगु उगु प्रतिवेदनय् किपू नगर पालिका व दक्षिणकाली नगरपालिकायात छगू हे यायेगु तर्क प्रस्ताव तयात:गु दु । प्रधानमन्त्री पुष्पकलम दाहाल प्रचण्डयात ल:ल्हा:गु उगु प्रतिवेदनय् नगरपालिका जुइगु नितिं थ्यंमथ्यं ९० हजार जनसंख्या मा:गु प्रावधान त:गु अवस्थाय् किपू नगरपालिकाय् ६४ हजार जक दुगुलिं दक्षिणकालि नगरपालिका नं दुथ्याका छगू हे नगरपालिका दयेकेगु प्रस्ताव यानात:गु दु । किपू नगरपालिकाय् हे मुक्कं याना आ: भिंगूगु वडा दुगु अवस्थाय् न्हूगु प्रावधान कथं आ: किपू नगरपालिका व दक्षिणकाली नगरपालिका नं दुथ्याका मुक्कं याना भिंखुगु वडा जक दयेकेगु प्रस्ताव यानात:गु दु ।

किपू नगरपालिकाया नां हे तयेगु धका: प्रस्ताव या:गु जूसां नं किपू नगरपालिकाय् हे बहुमत मजूसे बढिमत जक जुइ धुंकूपिं नेवा:तयगु नितिं दक्षिणकाली नगरपालिका नं दुथ्याकीगु अवस्थाय् भन हे अल्पमतय् लाइगु अवस्था वइ । थुकियात कया सरोकारवालातय्सं इलय् हे च्यूता प्वंकेमा: ।

गजल शौरभ शाक्यया

गजल-१५



थुखे शहरय् मनूत जायावल
उखे गां गामं मनूत हायावल ॥
शहरं लँ गां गामय् स्वास्वां वन
गां शहर दापु मदुगु चायावल ॥
ख:गु खँया न्ह्यने फयगं खँत
मिया जलं घ्य:थें नायावल ॥
मभिंया दु:ने भिं सुलाच्वंगु दइ
हासां हायेवं प्वत्तां वायावल ॥
छंगु पलासूइ नस्वा:हरर सौरभ
ग्वारागू लुथें नुगलय् गजल दायावल ॥

अमेरिकाय् नं मा: पहिचान नेपालय् जक मखु



-रोशन श्रेष्ठ

मलाकाइ तापुया खँ छकूचा कने ।
थ्व तापु अमेरीकाया हवाई राज्यया छगू
तापु ख: । थ्व थाययात हवाईया छुच्चापिं
मनूत च्वनीगु थाय् धका धाइ । छाय्
धा:सा इमिगु थासय वना छुं छकूचा
इमित मय:गु ज्यायात कि इपिं ल्वा हे
ल्वा:वइपिं । पिनेयापिं मनूत इमिथाय्
वया य:य:थे याइगु इमित मय: । इमिगु
भाय् स्थक वइगु इमित मय: ।

इमिथाय् न्या ला:वइगु इमित मय:
। हुल हुल मनूत चा:ह्यु वया इमिथाय्
यक्व यक्व नया फोहर याना थकीगु
इमित मय: । धिवा क्यना इमिथाय् यापिं
मिसतयेगु किपा: दयेकीगु, व इमिगु
किपा:या बेपा: याइगु इमित मय: ।
“जिमिगु थासय जिमित जिविका याये
ब्यू जिमिगु जीवनय् असर लाकीगु छुं
नं ह्युपा पिनेयापिं मनू वया यायेगु मखु,
ह्युपा: हयेमा:सा जिमिसं हे हये” –
इमिगु दर्शन थ्व हे जुयाच्वन । अथेजुया
इमित सलंस: दँ तक मेपिन्स ‘संगत
याये मत्य:पिं, ‘व्यवहारीकता मस:पिं’,
‘बुद्धि मरुपिं’ धका हिस्सायेगु यात ।

सन १९८५ पाखें निसें हवाईलय
पहिचानया लहर न्ह्यात । हवाई
अमेरीकाया छगू राज्य ख:सांतवि
हवाईया स्थानिय भाय् व संस्कृति अमेरि
कन भाय् संस्कृति नाप यक्व पा: ।
भीथाय् नेवा: भाय् व खँय भाय् धाये थें
। मुलधारय् समाहित जुयेगु कुतलय्
भीथाय् स्थस्य:तयसं नेवा:भाय् त्वता
हल । अनं लिपा उराय्, ज्यापु व ल्यं
दुपिं दक्कं नेवा:तसं नेवा:भाय् त्व:ता

खँय भाय् नाला कायेगु याना हल ।
हवाईलय नं अनयापिं मनूतसं
अमिकनाइज जुयेत थें थें बल्ला याये थें
थ:थ:गु मौलिक स्थानिय भाय् त्व:ता
हल । तर सन ८० या दशकय् थ:गु
पहिचान तंका छवयेमज्यू धैगु खँ हवाई
समाजं वा:चायेका हल । १९८७ निसं
पब्लिक स्कुल (सार्वजनिक ब्वनेकुथि)लय्
हवाईया छगू स्थानिय भाय् अनिवार्य
ब्वनेमा:गु प्रावधान दुतिन । व प्रावधान
अनया निजि ब्वनेकुथि अस्वीकार यात
। अथे जुवल्य स्थानिय भाय् ब्वनीपिं
पब्लिक स्कुलया ब्वनामि व स्थानिय
भाय् मब्वनीपिं निजि स्कुलया ब्वनामिपिं
निथ्व: हवाईलय दया वल ।

छुं दँ लिपा सी दत कि स्थानिय
भाय् ब्वनीपिं मस्त व्यवहारीक ज्ञानय्
यक्व हे न्ह्यनय् लाना च्वन । म्याथ व
रिडिङ धैगु अमेरीकाया Standard
MSA test य् स्थानिय भाय् ब्वनीपिं
ब्वनामिपिन्सं निजि ब्वनेकुथिया
ब्वनामिपिं सिबे बाँलाक लिच्व हल ।
जागिर नयेगु व जागिर नयेधुंका
प्रमोशन जुयेगुलिं नं स्थानिय भाय्
ब्वनात:पिं हे न्ह्य:ने न्ह्य:ने लाना वल ।

बिजनेस, इनोभेसन व क्रियटिभ
सोलुसनया ख्यलय नं स्थानिय भाय्
ब्वनात:पिं हे न्ह्य:ने खने दत । सिभिक
इन्जमेन्ट, नेगोशियसन स्कील, टीम
वर्क आदि ख्यलय नं स्थानिय भाय्
ब्वनात:पिं हे अब्बल खने दत ।

सेप्टेम्बर २०१० य् थ्व खँय विस्तृत
रिपोर्ट पिहाँ वयेवं अनया कम्पनि पिन्सं
जागिर वियेत ‘स्थानिय भाय् ब्वना त:गु
दु पिन्त’ अन्व: प्राथमिकता वियेगु याना
हल, छाय् धा:सा जागिर नकीपिन्त नं
बाँलागु सीप दुपिं मनूत यइ । निजि
ब्वनेकुथिइ ब्वपिं ल्यायम्हापिं जागीर व
सीप या ख्यलय ल्यूने ल्यूने लाना वनेवं
‘जिमित छाय् थनया भाय् सयेकेत पंग
तयागु ?’ धका माँ अबु व निजि

ब्वनेकुथिया संचालकपिन्त न्ह्यस: तयेगु
याना हल । थथे जुइवं आ: धमाधम
निजि ब्वनेकुथि पाखें नं स्थानिय भाय्
ब्वंकेगु याना हया च्वंगु दु । थ्व ह्युपा:
लिसं मेगु ह्युपा: नं वल । छगू जमानाय्
छुच्चापिं मनूत धाईपिं मालाकाइ तापुया
मनूत आ: बाँलागु सम्भावना दुपिं मनूत
कथं थुइका अनयापिन्त जागिर नकेत
कम्पनि त थें थें बल्ला याइगु जुया वल
। छाय्धा:सा मालाकाइ तापु पहिचानया
मुद्दायात बल्लाक ज्वनीपिनिगु थाय्
धका आ: नं नां जा: । आ: थ्व खँ
सिइका भी नेवा:तसं छु सयेके माल
छिकपिन्सं हे विचा: याना दिसँ । भीथाय्
खय् भाय् या ल्यू ल्यू ब्वाय् जुइपिं
खसबर्मू च्य: नेवा:पिन्त हलिमय्
जुयाच्वंगु थज्यागु खँ न्यना सयेके सिइके
यइ मखु जुइ । इमिगु नजरय् जि थें
पहिचानया मुद्दाय् थ:गु विचा: बिया
च्वनीपिं मनूत ‘बिखण्डनवादी’
जुयाच्वनी, संगत यायेमत्य:पिं जुयाच्वनी
। जिं च्वयागु थ्व खँ ला इमिसं ब्वनी हे
मखु, छाय् धा:सा इमिसं नेवा:भाय् ब्वने
सइ नं मखु जुइ । खस-वर्मपिन्सं छु छु
धाल व हे पत्या: जुया ल्यू ल्यू ब्वाय्
जुइगु व भव्ये नये दयेवं इमित मेगु छुं
नं म्वा:ल । लिपाया पुस्ता सरा: विइगु
इमित छु मतलब ? पहिचान धइगु
स्वाभिमान, आत्मसम्मान व
अस्तित्वनाप स्वापु दुगु विषय ख: ।
जातीय राज्य धइगु छगू जाति, समुदाय,
धर्म, संस्कृतिया पक्षपोषण याइगु राज्य
ख: गुगु थौंकन्हे नेपालय् दु ।

थ्व राज्यं २४८ दँनिसं आर्य
समुदायया भाषा, धर्म, संस्कृति,
परम्परा, भेषभुषायात जक संरक्षण यात
। वहे समुदाययात जक राज्य न्यंकनं
थ्यंकल । उकिं व जातीय राज्य ख: ।
थ्व जातीय राज्ययात सकसियागु मंका:
राज्य दयेकेमा: धैगु थौंया आन्दोलनया
स: ख: ।

नेपा: पासा पुच: अमेरिकां सत्यमोहन जोशी व जनकवि दुर्गालाल श्रेष्ठयात हन

अमेरीकाय् बसोबास याना
वयाच्वपिं नेवा:तयगु मंका: संस्था
नेपा: पासा पुच: अमेरिकां थ:गु २५
दँया मुँज्या लसताय् शताब्दी पुरुष
डा सत्यमोहन जोशी व जनकवि
दुर्गालाल श्रेष्ठयात वंगु शुक्रवा: छगू
ज्याभ्व: याना हंगु दु ।

नेपाल भाषा, साहित्य व संस्थाया
ख्वापौ ‘दबू’या निरन्तर प्रकाशनया
नितिं योगदानया कदरस्वरुप
वयक:पिन्त संस्थाया अध्यक्ष सरोज
प्रजापति सम्मान यानादिगु ख: ।

उगु संस्था अमेरीकाया
वासिङ्टनय् सन् १९९१ य् राम
मालाकारं स्थापना यानादिगु ख: ।



उगु संस्था नेपाल भाषा व संस्कृतिया
जगेर्नाया लिसं नेपा:या अनाथ मस्ततय्त
छात्रवृत्ति व प्राकृतिक विपदय ला:पिन्त
ग्वाहालि याना वयाच्वंगु ख: । नेवा:
न्त्यलुवा: मल्ल के सुन्दर नेवातयगु

थीथी विषय यात कया: नुगं खँ
तयादिगु ख: । उगु ज्याज्वलय ‘दबू’या
प्रकाशनया विशेष ग्वाहालिपिं अनिल
स्थापित, अर्विन्द्रमान सिंह व राजेन्द्र
ढकालयात नं सम्मान या:गु ख: ।

नयाँबजार क्लबया एम्बुलेन्स व शव वाहन गाडीया उलेज्या जुल



ज्वजलपा वा:पौ/

स्वीखुदै न्ह्यः नयाँबजारय् पलिस्था जूगु नयाँबजार क्लब किपूया हे दकले पुलांगु क्लब जुइमा: । गुगु थौतक मदिकक चल्य जुयाच्चंगु दु । थ्वयां न्ह्यः नं यक्व क्लब, संघ संस्था नीस्वनेगु ज्या मजगु मखु । तर निदै प्यदै च्यादै भिदै चल्य जुया वन्द जुयावंगु दु ।

न्हापां खेलकुदय् अप्वः ध्यान बिया वयाच्चंगु नयाँबजार क्लबं २०५० सालनिसें एम्बुलेन्स सेवा संचालन याना वयाच्चंगु खः । न्हापांगु एम्बुलेन्स संचालन जूगु भिदै दुबलय् जर्मन नेपाल सहयोग सं व क्लबया ६०% व ४०% प्रतिशत साभेदारी मेगु न्हगु एम्बुलेन्स संचालन याना वयाच्चंगु खः ।

एम्बुलेन्स भिदैतक वाहेक चल्य यायेमदुगुलिं हानं मेगु न्हगु एम्बुलेन्स न्यायमाल धका: धेवा मुंकेगु भवलय् किपूया विदेशय वनार्चपिंनसं नापं ग्वाहालि याना न्हगु एम्बुलेन्स न्या:गु दु । पुलांगु एम्बुलेन्सयात शव वाहनया रुपय् छ्यःगु दु ।

ध्यः चाकु सल्लू खुन्हु सांसद राजन के.सीं रिबन चाना: निगः गाडीया नं उलेज्या यानादीगु खः । नयाँबजार क्लबया नायः ईश्वर मुनी बज्राचार्यया नायोसुइ जूगु उगु ज्याभवलय् राष्ट्रिय गान हायेका मौन धारण याना क्लबया मदुपिं ज:दुज:पिनिगु बिचा: हायेकूगु खः ।

लसकुस न्वचू क्लबया छ्याञ्जे किरण महर्जनं बियादीगु खःसा एम्बुलेन्स तयगु निंति क्लबं या:गु प्रयासया बारे क्लबया पुलांम्ह नायः नारायण महर्जनं दुयंक कुला दिल । एम्बुलेन्स न्यायेत गाक्क धेवा दुहां वयेधुंका: नं देश विदेशं ग्वाहालि याये धा:पिं दुगु खः । थ:पिन्त गाक्क धेवा दुहां वयेधुंकीं म्वाल् धका: मकयागु खँ नं कनादिल । अथेहे क्लबं याइगु भावी योजनाया बारे पुलांम्ह नायः प्रकाश महर्जनं कुला दीगु खः । वयकलं नयाँबजार क्लबं एम्बुलेन्स



न्याये धुन, किपुली न्हापां खुसी शव वाहन नं दत । आ: थौकन्हय्या सामाजिक परिवेश व नेपा:मितय्गु आयु अप्वया व:गुलिं ज्येष्ठ नागरिकपिं अप्वः दत । थ्व न्हूवजारय् गनं फयेतुना गफ यायेगु थाय् मदुगुलिं ज्येष्ठ नागरिकपिन्त दिवा सेवा यायेगु योजना तयागु खँ नं कनादिल । उकिया निंति थन हे ख्यलय् छगू थाय् कया: ज्येष्ठ नागरिक दिवा सेवा संचालन यायेगु बिचा: दुगु खँ कनादिल ।

न्हगु एम्बुलेन्स न्यायेत धेवा ग्वाहालियापिं १४० म्हासित कदर पत्र मूपाहां, विशेष पाहार्पिन्सं ल:ल्हानादीगु खः । कदर पत्र ल:ल्हाये धुंका: थ:गु नुगः खँ तय्गु भवलय् अनक कन्स्ट्रक्सनया मालिक श्रीराम महर्जनं नयाँबजार क्लबं याना वयाच्चंगु सामाजिक ज्यायात च्वछ्यायदिसं थज:गु सामाजिक ज्याय न्ह्यावलें ग्वाहालि यायेत थ: तत्पर जुयाच्चंनगु खँ प्वकादिल । अथे हे क्लबया सल्लाहकार प्रा.डा. रामकृष्ण महर्जनं नं क्लबया ज्यायात च्वछासैं हानं हानं थुज:गु वांलागु ज्या याना वनेफयमा धका: भिन्तुना बियादिल ।

राजनीतिक पार्टीया प्रतिनिधिपिं ने.का.या राजकुमार नकर्मि, एमालेया विकास महर्जन, माओवादी केन्द्रया शम्भुराम महर्जन, र प्रपाया जितवहादुर विष्ट, नेमकिपाया हरिकुमार महर्जन, नयाँ शक्ति पार्टीया सुनिता शाक्यं नं भिन्तुना न्वचु बियादीगु खः ।

मूपाहां राजन के.सीं थ: काठमाडौं जिल्ला विकास समितिया इलाका सदस्य जुयाच्चनाबलय् नं थ्व क्लबयात ग्वाहालि यानागु हे खः । आ: नं थ:पाखें फुगु चागु ग्वाहालि यायेगु वचं बियादिल । थ: नेपाली कांग्रेस पार्टीया चुनाव चिं कया: त्याना व:गु कसा आ: सकसियां सांसद खः । उकिं किपूया विकासया निंति योजना दयेका ज्या याना वनेगु स्वयेमाल । भीपिं सकलें मिलय जुया ज्यायात धा:सा याये मफइगु ज्या छुं नं म्दु धयादिल ।

सभा नायः ईश्वर मुनी बज्राचार्य ग्वाहालिया:पिं सकसितं सुभाय बिया सभा व्वचायेकूगु खः ।

क्लबया ज: रोजी महर्जनं ज्याभव: न्ह्याकादीगु खः ।

ज्येष्ठ नागरिक सेवा केन्द्र पांगाय् जन्मन्हि

ज्वजलपा वा:पौ/

वंगु वैशाख ५ गतेनिसं पांगाय् लाछीच्चंगु नास:द्यःया छेंय् ज्येष्ठ नागरिकपिन्त दिवा सेवा बिया: वयाच्चंगु ज्येष्ठ नागरिक केन्द्र पांग्ग मन्तय् आस्थाया केन्द्र बिन्दु जुया वयाच्चंगु दु ।

केन्द्रया मन्तय्गु व्यवहार व इमिसं ज्येष्ठ नागरिकपिन्त थ:गु धेवा तया: सेवा यानाच्चंगु खना: मेमेपिनिनं नुगः व्वसाला वंगु दु । संचालन जूगु छुं दिनिसं थीथी थसय्यापिं मन्तसं थ:गु जन्मन्हि, मस्तय्गु जन्मन्हि लसताया खँय् अन वया: ज्येष्ठ नागरिकपिन्त नकेत्वंके यायेगु ज्या च्वंगु खः । अले लच्छिया छक: गनं द्य:याथाय् चाहिइके यंकेगु नं याना वयाच्चंगु दु । अथे चाहिइके यंकीबलय् मोटर भाडा तयावीपिं नं दु । सुं दाता मन्त धा:सा थ:पिन्सं हे भाडा पुला नं चाहिइके यंकाच्चंगु दु ।

थ्वहे सन्दर्भय् मिहग: सनिवा: पांग्ग ध्वाकाफ:या देवकाजी डंगोल कतारनिसं थन वयाच्चंगु इलय् वय्क:या जन्मन्हि ज्येष्ठ नागरिक सेवा केन्द्रय हनेगु ज्या जुल । अन केक ताना सकसितं नकेगु व जन्मन्हिया भिन्तुना कालविल नं जुल । उगु लसताय् वयकलं सेवा केन्द्रयात लच्छिया न्याद्र: तका दरं दच्छिया निंति ख्बीद्र: तकाया चेक च्वया बियादिल ।

अथे हे पांग्ग लाछिया न्हुच्छेमाया महर्जनया ९६ दँया बुन्हिया लसताय् वयक:या काय भीमलाल महर्जनं ज्येष्ठ नागरिक सेवा केन्द्रया ज्येष्ठ नागरिकपिन्त स्वंग: बसय् तया व्वय्नाय् चाहिइके यंकल । व्वयेना गणेश:या पुजा नापं भजन किर्तन याना न्ह्याइपुक न्हिछ्याना भव्य नका: ह:गु केन्द्रया दुर्गावहादुर महर्जनं कनादिल ।



निर्मल बुद्धभूमि सहकारीं थीथी व्यक्तित्वपिन्त हन

ज्वजलपा वा:पौ/

किपूया त:ग:वपिच्चंगु निर्मल बुद्धभूमि सहकारी संस्थाया खुक्क:गु साधारणसभा वंगु शुक्रवार बाघभैरव बैक्वेटया हलय् जुल ।

संस्थाया नायः योगेन्द्र दर्शनधारीया नायोसुइ जूगु उगु ज्याभव:या मूपाहां स्वास्थ्य मन्त्रालयया निवर्तमान सहसचिव विर न्द्र अधिकारी त्वावरालय् मत च्याका: उलेज्या यानादीगु खः ।

मेपिं पाहापिं मोविल्याण्ड गुपयाम नायः दिनेश दर्शनधारी, बरिष्ठ समाजसेवी रजनी राजभण्डारी, मातापिता स्मृति कोषया संयोजक मय्जु बशला दर्शनधारी, आदिवासी जनजाति महिला वचत तथा ऋण सहकारी संस्थाया सचिव मय्जु यशोदा राई, टिकेश्वर कृषि बहुउद्देश्यीय सहकारया दांभरिं प्रभात बुढाथोकीपिं पाहाँकथं भ्कायादीगु खः ।

लसकुस न्वचू व्यवस्थापक मय्जु पुजा दर्शनधारीं बियादीगु खः । अध्यक्ष योगेन्द्र दर्शनधारी आ.व. २०७२/०७३या वार्षिक प्रतिवेदन न्ह्यव्वया दिल ।

ज्वजलपा वा:पौ व कीर्तिपुर सन्देशया प्रकाशक व नेपालभाषाया बरिष्ठ साहित्यकार नजरराम महर्जयात खादां व्वखायेका हना: पौ बिया हनेगु ज्या जुल । अथे हे ज्येष्ठ नागरि



क सेवा केन्द्र पांगाय् नायः दुर्गा कुमारी महर्जन व संचालकपिं दुर्गावहादुर महर्जन, हरिदेवी महर्जन, सत्तुराम महर्जन, देवलक्ष्म महर्जन व रामशरण डंगोलपिन्त नं हनेगु ज्या जुल । नापं ज्येष्ठ नागरिक सेवा केन्द्रयात बुद्ध प्रतिमा नं उपहार बियादिल ।

अथे हे मानव अधिकार संगठन किपूया संस्थापक नायः बाबुराम महर्जन, धर्मकीर्ति विपस्यना केन्द्रया टूष्टी गणेश

दर्शनधारी व त्रिरत्न कीर्ति विहारया संस्थापक जुलुम शाक्यपिन्त नं हना पौ बिया: हंगु खः । उगु मुंज्याय् सम्मानीत व्यक्तित्वपिं मध्ये नजरराम महर्जन व बाबुराम महर्जनं थ:गु नुगः खँ तयादीगु खः ।

उगु मुंज्याय् वचतकर्ता मोहनकाजी महर्जन व असल ऋणी प्रविन शाक्ययात नं विशेष अतिथि दिनेश दर्शनधारी सम्मान यानादीगु खः । अथेहे संस्था उत्कृष्ट बजार प्रतिनिधी श्रीमती उर्मिला महर्जन, उत्कृष्ट कर्म कर्मचारी श्रीमती कविता महर्जन, विश्वासया प्रतिबिम्ब श्रीमती गणेश कुमारी महर्जनयात अध्यक्षपाखें सम्मान यानादीगु खः । अथेहे अध्यक्ष कर्मचारीपिन्त प्रमोशन बिया सम्मान यानादिल । पुजा दर्शनधारी प्रबन्धक, रवि महर्जन कर्पोरेट अफिसर, सलिना महर्जन सह-प्रबन्धक व डिल्लीराज दाहालयात व्यवस्थापक व्वछिना दिल ।

शुक्रवा जूगु साधारण सभां न्हगु ज्यासना पुच: नं ल्य:गु दु । गुगु थथे दु – अध्यक्ष योगेन्द्र दर्शनधारी, उपाध्यक्ष सपना दर्शनधारी, सचिव रवि महर्जन, कोषाध्यक्ष सृष्टी महर्जन, सदस्य सगुन महर्जन, सलिना महर्जन, सरोज महर्जन सर्वसहमतिं ल्य:गु खः । अथे हे लेखा समिति संयोजक पपुला महर्जन, सदस्य कीर्ति महर्जन व शैलेश महर्जन ल्यया:दीगु खः ।



खुसि नाप स्वापू दुगु ई

श्रीकृष्ण महर्जन

नेवा:तयसं प्रकृतियात पुजा आज्ञा याना वयाचंगु दु । सूर्य:निसैं तिमिला अले बुनिसैं अन्नयात नाप थ:पिन्त च्वनेत मा:गु छैनिसैं मतयात तकं छ: भा:पिया पुजा आज्ञा याना वयाचंगु दु । थ:पिनिगु जीवनय् मदयेकं मगा:गु ज्याभ:निसैं ल्वाभ:यात तकं पुजा याइपिं नेवा:तयसं मनूयात तकं पुजा याना वयाचंगु दु ।

थ:गु हे कथंया दर्शन दुपिं नेवा:तयसं खुसियात नं विशेष कथं पुजा आज्ञा यायेगु नापं खुसियात नं छ: कथं नालेगु, खुसिइ वना ख्वा: सिलेगु तकं याना वयाचंगु दु । पवित्र थाय्या रुपय् खुसियात नाला वयाचंगु दुसा खुसिइ दच्छिया निला तक वनेगु याना वयाचंगु दु । यंलाया इलय् खुसिइ ख्वा:सिला पीगंछ:याथाय् बाजं थाना वनेगु नेवा:तयगु परम्परा ख: । अष्टमातृका सहितया पीठगण छ:याथाय् अथे वने न्हय: लच्छि तका खुसिइ वना ख्वा:सिले याइ । अबले विशेष याना पीगंछ:याथाय् पुजा वनेगु याना वयाचंगु ख: ।

नेवा:तय सीम्ह उइगु नं खुसि लिक्क हे जुइ । खुसि लिक्क दिप दयेकात:गुया मू कारण धइगु खसिया ल: पवित्र जुया खुसिया ल: सीम्हेसित त्वंकेगु नापं लिपा खुसिइ हे चुइका छवयेगु तकं याइ । अथे हे नेवा:तयसं छें दना भिकेगु इलय् जुइमा वा मचा बुया व्यंकेगु इलय् छाये मजुइमा खुसिया ल:या पवित्र कथं नाला हे वयाचंगु दु । नेवा: संस्कृति उगु हे कथं कयनाचंगु दु ।

दैय् दसं पोहेलाथ्व पुन्हिनिसैं लच्छि तक सिल्लाथ्व पुन्हि तक थ:थ:गु छेंय् स्वस्थानिया बाखं कनेगु,



सुथ न्हापां माघ हा:वनेगु अले सक्कया नादि खुसि अर्थात सालीनदिइ व खपया खोह अर्थात हनुमानघाटय् मेला जुइगु चलन दु । थ्व लच्छिया ई मूल रुपं खुसि नाप हे स्वनाचंगु दु । माघ हा:वनेगु धइगु खुसिइ वना ख्वा: सिलेगु नाप नापं सकलें मुना माधव नारायण नापं थीथी छ:पिनिगु नां कया म्ये हाला वइगु ख: । विशेष याना माधव नारायण छ:यात प्रमुख छ: कथं नाला माधव नारायणया जय जयकार याना वइगु ख: । तर दु:खया खँ थौंकन्हय् बागमति विष्णुमती तसकं फोरह जूगुलिं खुसिइ मवंसं थीथी छ:याथाय् वनेगु यानाह:गु दु । किपुलिइ च्वपिं नं न्हापा माघ वनेगु धइगु बागमती खुसिइ हे वनीगु ख: तर खुसिइ ध: ल्वाकछ्यानाह:गुलिं तसकं फोरह जुल अले ख्वा: सिले हे मजिया वयेवं खुसिइ मवंसं सिबारे महाछ:याथाय् वनेगु चलन यानाह:गु दु । छुं दै न्हय:निसैं थुगु कथं चलन जुयाव:गु दु ।

सुथ न्हापां लच्छि तक माघ वनेगु भवलय् किपुलिइ जक मखु यें, यल, खपय् नं थुगु हे कथं बुलुहुं खुसिइ वनेगु त्व:ता: पीगं छ:याथाय् वनेगु नापं माहाछ:याथाय् वनेगु यानाह:गु दु ।

थ्व हे इलय् यें जिल्ला दुने ला:गु नेवा:तयगु धार्मिक नापं सांस्कृतिक अले ऐतिहासिक रुपं महत्वपूर्णगु वस्ती सक्कया नादी खुसिइ त:धंगु मेला जुइ । नादि खुसि धइगु स्वस्थानि बाखंया आधारय् धायेगु ख:सा चन्द्रवती दुलिं कुतुवना ल: हे दिनाचंगु खुसि ख: ।

खप भासं ल:यात ना: धाइगु अले ल: दिउगु अर्थात ना दिउगु खुसि जुया हे नादि खुसि धायेगु याना वयाचंगु दु । नेवा: मखुपिन्सं साली नदि धायेगु याना वयाचंगु उगु लागाय् लच्छि तक अपसं च्वनीपिं न्हिया न्हिथं म्वो ल्हुइगु अले माधव नारायणया नेतृत्वय् धलं दनेगु चलन दु । स्थानीय मनूतयसं



लच्छि तक छेंय् छेंय् स्वस्थानी बाखं कने धुंका: सफूयात छायेत:गु स्वां तकं पवित्रगु थाय् कथं नाला: खुसिइ चुइका छवयेगु याइ । उकिं थ्व लच्छि धइगु खुसि नाप स्वापू दुगु ला ख: धका: धायेछिं । खुसि नाप संस्कृतिनिसैं जीवन स्वनाचंगु दु धका: थुइकेगु अले खुसिया महत्वयात थुइकेगु ईया रुपय् पोहेलाथ्व पुन्हिनिसैं सिल्लाथ्व पुन्हि तक लच्छि लागातर माघ वनेगुनिसैं थीथी कथंया मेला खुसि नाप स्वाका यानाचंगु खयेमा: धका: धायेछिं ।

खुसि फोहर जुल धा:सा नादि खुसिया मेला अर्थात साली नदिया मेला प्रभावित जुइ धका: तायेका उगु खुसि फोहर याके मविइगु नितिं निरन्तर रुपं सक्रिय जुयाचंगु दु । आ: तक खुसि बांलानाचंगु हे दु । तर उखे खपया जुइगु थासय् धा:सा तसकं फोहर जुया प्रभावित जुयाचंगु दु । खुसिइ ध: ल्वाकज्याना अथे प्रभावित जूगु ख: । उकिं खपया खोरय् जुइगु लच्छियंकया मेला तकं प्रभावित जुगुयात कया स्थानीयवासी चिउता प्वंका: ह:गु दु । गथे सक्कय् लच्छि तक मेला जुइगु ख: अथे हे खपय् नं जुइगु ख: । उकिं थ्व

लच्छि तक खुसि नाप स्वापू दयाचंगु ई ख: ।

लच्छि तक छेंय् छेंय् स्वस्थानी बाखं कने धुंका: सफूयात छायेत:गु स्वां तकं पवित्रगु थाय् कथं नाला: खुसिइ चुइका छवयेगु याइ । उकिं थ्व लच्छि धइगु खुसि नाप स्वापू दुगु ला ख: धका: धायेछिं । खुसि नाप संस्कृतिनिसैं जीवन स्वनाचंगु दु धका: थुइकेगु अले खुसिया महत्वयात थुइकेगु ईया रुपय् पोहेलाथ्व पुन्हिनिसैं सिल्लाथ्व पुन्हि तक लच्छि लागातर माघ वनेगुनिसैं थीथी कथंया मेला खुसि नाप स्वाका यानाचंगु खयेमा: धका: धायेछिं ।

तपाईको टोलमा भएका घटना कीर्तिपुरको समाचार बनाउने हो भने तपाई एक कल फोन गर्नुस् हामी तपाईको टोलको समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाचंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखं/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७, ९८०८६२६४२० ई-मेल : kirtipur_sandesh@live.com

अन्धविश्वासय् लिकुनाच्चंगु विज्ञान स्वाहानय् हाचां गाये मज्यू



पन्नारल महर्जन

नेवा: समाजय् थीथी कथं संस्कृति दु अले थ:थ:गु कथं धारणा दयेका वयाच्चंगु खने दु । संस्कृतिइ विविधता दुपिं नेवा: समाज दुने थथे याये मत्य: अथे याये मत्य धका: थीथी कथंया अन्धविश्वास ल्यनाच्चंगु दु । अज्व:गु कथंया अन्धविश्वास दुने वास्तवय् विज्ञान सुलाच्चंगु दु धका: पन्नारल महर्जनं क्यादीगु दु । वयकलं नेवा: समाज नाप स्वाका अन्धविश्वासाय् लिकुनाच्चंगु विज्ञान नांगु सफू तकं चवयादीगु ख: । व हे सफूपाखें निरन्तर रुपं न्हयव्वया वयाच्चनागु ख: – सं.

स्वाहाने धयागु छेंय थहाँ क्वहाँ जुइगु त्वाथ: ख: । न्हापा न्हापाया छेंय स्वाहाने सियागु दयेकातइ । अप्व: धयाथें स्वाहानेय् लिउनेया व्व त्वातां जुइकातइ ।

स्वाहानेय् जुइबलय् छम्ह क्वय् व मेम्ह च्वय्या

स्वाहाने जुल धायेवं क्वय् च्वंम्हसित हाचां गा:गु जुइ । क्वय्या स्वाहाने सुं जुयाच्चंगु दयेकं च्वय्या स्वाहाने मेम्ह थहाँ मवंकं हाचां गाइगु जुइमखु ।

न्हिथं जुइमा:गु स्वाहाने धू भचा दयाच्चनी । थहाँ क्वहाँ जुइबलय् भचाभचा धू कुतुं नं वनी । हाचां गायेका च्वंम्हसित कुतुं वंगु धुलं गइ, थ्व स्वाभाविक ख: । तर धू धयागु बांला:गु मखु, थ्व शुभ नं मखु । वरु थस्वल धा:सा मिखाय् कुइ ।

स्वाहानेय् हाचां गायेगु छगू पापया ल्याखं कयात:गु दु । क्वकालिपिसं हाचां गाइबलय् माफि पवनेकथं भागि तकं यायेगु चलन दु । थ्व मामलाय् मिजपिन्त सिकं मिसापिन्त अप्व: च्यूता: कायेका त:गु दु ।

न्हापा न्हापा मिसापिनि पर्सि सिनेगु बाहेक

कट्टु सुरुवा: आदि छुं नं न्ह्यायेगु चलन मदु । थुकिं याना इमिसं हाचां गाइबलय् भचा सुख मदये य: । उकें मिसापिं स्वाहाने थहाँ क्वहाँ जुइबलय् पर्सि घय्सुना: जुइगु याइ ।

त: जहान दुथाय् व यक्व चलय् जुइथाय् स्वाहाने हाचां गाइ धका: पियाच्चनां लिलाइ मखु । छक: वनेत घण्टन पि माली । उकें थज्याथाय् स्वाहानेय् लिउनेया पाताय् ह्व: मदयेक सिपतिं भुनातइ । मू स्वाहानेय् हाचां गा:सां उलि च्यूता: तइ मखु ।

स्वाहानेय् हाचां गाये मत्य:गु मुल्य मान्यताकथं स्वाहानेय् थहाँ क्वहाँ जुइत सतर्क जुया: जुइ । हाचां गाइगु भय मदयेकेया लागि स्वाहाने गये न्ह्य: 'विन्हा: वि' धायेगु चलन दु । थथे धाइबलय् सुनं स्वाहानेय् वनाच्चंगु द:सा स: विइगु याइ ।

समावेशी मजगु भुखाय्



किशोर धुस:

सुख दु धाई धायेत:ला मखनां भीसँ गनगन दु:ख जक वई स्व भवस्भवस मदेक अनं थनं भुखाय व्व:गु दच्छि दत एएन व्वयातुं च्वन उलिमछि जन धन स्यंगु स्वया चोनेफुम्हं न पापी नेता तयेत जक थीमफु छांय भुखाचें न छु उमित चवं हे छोया ह:गु जकं ख:ला थन नेतात जूसा ज्वर बोसां लंकी विदेशय् वनां न भुखाय पिडितपिनि मूता:मदु १५ द्र कायेत न समावेशी ज्वीमा:थाय् बदमासी यात स्व चवं न यंकेमा:नि चवं राहत नैपिं भिम्ह नीम्ह जूसौं न ॥

किपू नगरपालिकाया २५ व्व:गु नगर परिषदया निर्णय पितव्वल



ज्वजलपा वा:पौ /

किपू नगरपालिकाया २५ व्व:गु नगर परिषदं निर्णय या:गु खँत पित विइगु ज्या वंगु पुस २८ गते किपूया हिलसाइड होटलय् का.जि. क्षेत्र नं.१०या सभासद राजन के.सीं त्वावरालय् मत च्याका उलेज्या यानादिल ।

किपू नगरपालिकाया कार्यकारी अधिकृत सुमन कुमार कार्कीया सभा नायोसुइ जूगु उगु ज्याभव्य:या मेपिं पाहापिं सांसद रुपा महर्जन, विनोद श्रेष्ठ, काठमाडौं जि.वि.स.या प्रतिनिधि दिपक के.सी. यमुना श्रेष्ठ, प्रा.डा. हिराबहादुर महर्जन, शुक्र सागर श्रेष्ठ, ई. मथुरा डंगोलपिं पाहाकथं भायादीगु ख: ।

कर्मचारीतसें तयार या:गु किपू नगरपालिकाया आ.व. २०७४/०७५या बजेट कार्यकारी अधिकृत सुमन कुमार कार्की ३६ करोड धेवाया बजेट सार्वजनिक यानादिल । उगु ज्याभव्वलय कीर्ति अध्ययन तथा अनुसन्धान मण्डलं तयार या:गु “कीर्तिपुरको संक्षिप्त चिनारी” सफू नं पितव्वज्या या:गु ख: । उगु सफू पितव्वज्या या:गु ज्याभव्वलय कीर्ति अध्ययन तथा अनुसन्धान मण्डलया नाय: वा दुज:पिं सुयातं नं मञ्चय मस:तूगुलिं स्वकुमित अजुचाल । उलिमछि दुखसिया अध्ययन अनुसन्धानयापिन्त छांय मस:तूगु जुइ धका: अप्व:सें जिज्ञासा प्वकाच्वन ।

उगु ज्याभव्वलय मूपाहां सांसद राजन के.सिं थ:गु नुग: खँ तयगु भव्वलय धयादिल, “भीपिं सकलें मिलय जुल धा:सा किपू नगरपालिकायात नमूना नगरपालिका दयेके फइ ।

अथेहे सांसद रुपा महर्जनं किपू नगरपालिका गठन जूगु २० दँ दुसां थन खास ह्यूपा: मव:गु, ल:या समस्या अथे हे दुगु । सकलें छप्पं छथी जुलधा:सा किपूया समस्या समाधान जुइ धयादिल ।

सांसद विनोद श्रेष्ठं नगर विकासया निर्तिं सकलें छप्पं छथी जुलधा:सा सम्भव जुइ धा:सें विकासया खँय सकलें छप्पं जुइत इनाप यानादिल । प्रा.डा. हिराबहादुर महर्जनं महाराजगंगा शिक्षण अस्पताल किपूली हत्येत्यंगु खँ कनादिसें किपूयात शैक्षिक गन्तव्यया रुपय् म्हसिइकेगु जुइ धयादिल ।

राजनीतिक दलया प्रतिनिधित्व याना माओवादी केन्द्रया शम्भुराम महर्जनं किपूया विकासया खँय थ्व पार्टी व पार्टी मधा:से सकलें किपूमि जुया छप्पं छथी जुल धा:सा याकनं किपूया विकास जुइगु खँ कनादिल । उगु ज्याभव्वलय शारिरीक सुगठनय् सिरपा त्याकूम्ह ननिता महर्जनयात भिद्व दांसहित सम्मान पत्र बिया सम्मान या:गु ख: ।

टुल टुलं स्वया च्वनेगु जुई

छिकपिंत यक्को यक्को धन्यवाद दु :

शाहवंशमा एकाधिकारं मुक्त जुया

दे व जनतायात ध्याचले घ्वाना

ल्हातय् लागु राजकाज दूरपयोग याना च्विपंत

नव उदारवादी शोसक जुया

दे व जनतायात गुमराहलय् तथा

निलज कलाकारया रुप कया

निर्वस्त्र नाटक मञ्चन याना च्विपंत

ना पद व इज्जत जक मखु

धेवायात विशेष महत्व विया

थपिनि गगनचुम्बी महल दयका

जनतायात बर्क फुसुलुं भाषण विया च्विपंत

दे दयकेगु बहाना बाजी प्रस्ताव हया

थ:गु कर्तव्यं विमुख जुया

छिमेकीया इशारा कथं

दे चलय याय्त स्वया च्विपंत:

पदीय दायित्वं विमुख जुया

जनताया विचय त्वापु ख्यापु जइकथं

न्हु न्हुगु खं न्ह्योने हया

जनता थ: थ: त्वाका च्विपंत

भीगु हे भोट कया त्याका

भीगु हे छयने मुस्या सिया नया च्विपिं

नेतातय्त: म्हसिके मफुपिं


गज्यापीं जनता त: भीपिं



कवि राम महर्जन

की.न.पा. १६,

नगाउँ



पांगाया
विष्णुदेवी
बालकुमारी जात्रा


बजारय् वये
धुंकूगु दु
थ:गु प्रति
सुरक्षित
यानादिसँ

स्वापू नितिं मेमेगु फोन

नम्बर: ४३३४०१३,

९८४१७५२५८३,

९८४६०४६१२३९



दक्षिण पश्चिम
लागाया
बखुमद: जात्रा
न्हय्गां जात्रा

नेपाल सम्बत

नरेन मान

खासी वजा: किपू



भी नेवा:त हे ख: नेपा: देय्या खा:
नेपाल सम्बत न्ह्याकूम्ह शंखधर साखा ॥

न्हूदँ वल नेवा:त हुरु हुरु मुन
छन्हु लिपा वास्ता मरु सुरु सुरु वन ॥

पर्दा उले न्हयो हे दुनेया लू सियेथें
नसंचा उले धुनेवं विक्रम सम्बत छ्य:थें ॥

भुखायचं नेपा:या नेवा: म्हसिका स्यंकल
ग्वाहालिव:गु दक्ख मसिउ गन प्वंकल ॥

नेवा:त न्ह्यचिला सम्पदा छुना त:गु
आ, छाय् जुई नेवा:त लिचिला च्वंगु ॥

छन्हु तसकं हालेवं हेलमेट मपूसे मोटरसाईकल ब्वाकेवं
छ्यालिला नेपाल सम्बत, थ:गु छेय् हे थ--: भाय् मल्हाय्कं ॥

गनयां मदुपिं चुनावय् त्याका थाईपिं नेवा:त
नेवा: त्याका नेपा: च्वन्ह्याकेतविचा: मयाईपिं नेवा:त ॥

भीगु थासय् भी लाय् धुकल क्वय् क्वय्
तापालय् च्वपिं थ्यने धुकल च्वय् च्वय् ॥
नेवा:तय्सं ब्वनेगु हे त्व:तलला
नेपा: च्वन्ह्याकीपिं नेवा:त हे तनला
न्ह्योसलय् न्ह्योस: जक लिस हे मदुला

थ्व न्हूदँ निसं भीसं न्हयलं चाय्केतु
नेवा:त हे नेपा: ख: थ:त म्हसिकिनु

छ्याक:ल्वतय् मंका: कथं थुकलं बिया
द्य:ध्वाखाया पुजा यानात:गु ल्वंदुथाय्
जूगु कोणसभाया किपा: बिशेष



पृथ्वीनारायण शाहया नामय् थुकलं बिइगु याना वयाच्वंगु
छ्याक:ल्वहं । स्थानीय मनूतय्सं उगु ल्वहंया महत्वया थुइका
आकर्षक जुइक चाक:हिइक अप्पां सियात:गु अवस्था ।



पौष २७ गते पृथ्वीनारायण शाहया जन्मदिनय् किपूमितय्त पृथ्वीनारायण शाहया फौजं गोरखा राज्य विस्तारया भूवलय् या:गु गलत ज्या
नाप नापं किपूमितय्गु विरताया विषययात कया नेवा: प्रदेशय् आदिवासी जनजाति जागरण अभियानं या:गु विशेष ज्याभ्व:या लू



पृथ्वीनारायण शाह चुलुया द:गु ल्वतय् किपूमितय्सं पुजा यानाच्वंगु
ल्वहं । थुगु ल्वहं लँसिवें भन भन क्वय् लाना वनाच्वंगुलिं खने
मदया वनाच्वंगु दु ।



बिचा: हायेका

बुदिं ने.सं. १०३६



मदुगु :

२०७३/७/१४



मदुम्ह नाथलाल डंगोल



ज्यापु महागुथि किपू नगर समितिया ज्यासना
पुच:या दुज: बासुदेव डंगोलया अबु
नाथलाल डंगोल वंगु कार्तिक १४ गते सच्छि व
छदंय् मदुगुलिं दु:खंक:पिं सकल छेंज:पिन्त धैर्य धारणा
याये फयेमा धका: कामनायासैं बिचा: हायेकाच्वना ।

ज्यापु महागुथि
किपू नगर समिति

सुचं ! सुचं ! ! सुचं ! ! !

ज्यापु महागुथि किपू नगर समितिया ग्वसालय्
नेपालभाषा साहित्य गोष्ठी जुइत्यंगु दु ।

साहित्य गोष्ठी जुइगु दिं

वइगु सिल्लागा आमाई फागुन १५ गते) आइतवा:
च्वसू चिनाखं, बाखं, च्वखं न्ह्यागु नं बिया
दीफइ ।

च्वसू बिइगु थाय्:

मिलन स्टूडियो अमल्सि,
बाघभैरव आयुर्बेदिक वास: पस: (कुलबहादुर)
त:ग:वपि,
पांगा बुक्स एण्ड स्टेसनरी, ध्वाखासी पांगा

ज्यापु महागुथि
किपू नगर समिति